

UniMAP Berkunjung ke 2 IPT di Surabaya

Universiti Malaysia Perlis (UniMAP) telah mengadakan kunjungan mesra ke dua buah Institusi Pengajian Tinggi (IPT) di Surabaya dalam usaha mengembangkan jalinan kerjasama dengan institusi pendidikan di bandar tersebut. Kunjungan tersebut diketuai sendiri oleh Naib Canselornya, Brig. Jen. Datuk Prof. Dr. Kamarudin Hussin yang mana ianya merupakan kunjungan pertama beliau ke IPT di bandar tersebut. Kunjungan tersebut juga diadakan bersempena dengan penganjuran Seminar Pendidikan Melayu Antarabangsa Kali Ke-3 (SePMA III) di bandar tersebut mulai 3 hingga 5 Mei ini. Kunjungan turut disertai oleh Pengerusi Lembaga Pengarah Universiti, Dato' Ir. Dr. Zainai Haji Mohamed.

Dalam kunjungan pertama ke Institut Teknologi Sepuluh Nopember (ITS), delegasi UniMAP disambut oleh Timbalan Rektor Akademik dan Hal Ehwal Pelajar ITS, Prof. Dr. Ing.Ir. Herman Sosongko. Dalam pertemuan tersebut, Datuk Prof. Dr. Kamarudin menyatakan hasrat untuk mengembangkan lagi jalinan kerjasama dalam beberapa bidang yang merupakan kepakaran UniMAP seperti robotik, elektrik, sumber tenaga boleh diperbaharui, kejuruteraan teknologi, UAV selain mengukuhkan lagi jalinan dalam bidang Geopolymer.

Kunjungan delegasi UniMAP kemudiannya diteruskan ke Universitas Muhammadiyah Surabaya dengan disambut oleh Rektornya Dr. Sukadiono. Bagi Universitas Muhammadiyah yang mempunyai lebih 160 cawangan di seluruh Indonesia, Datuk Prof. Dr. Kamarudin melihat prospek jalinan kerjasama dalam bidang-bidang sosial sains, seperti pengurusan perniagaan, media baharu selain bidang biomedik serta bahasa antarabangsa.

